

Na osnovu člana 32. stav 6. Zakona o namještenicima u organima državne službe u Federaciji Bosne i Hercegovine ("Službene novine Federacije BiH", broj 49/05), federalni ministar pravde donosi

## **PRAVILNIK**

### **O SADRŽAJU I NAČINU POLAGANJA STRUČNOG ISPITA NAMJEŠTENIKA U ORGANIMA DRŽAVNE SLUŽBE U FEDERACIJI BOSNE I HERCEGOVINE**

#### **I - OSNOVNE ODREDBE**

##### **Član 1.**

Ovim pravilnikom utvrđuje se sadržaj i način polaganja stručnog ispita namještenika iz federalnih, kantonalnih, gradskih i opštinskih organa državne službe u Federaciji Bosne i Hercegovine (u daljnjem tekstu: Federacija) i drugih osoba koje podliježu obavezi polaganja tog ispita pred komisijom koju imenuje federalni ministar pravde odnosno pred komisijom koju imenuje rukovodilac kantonalnog organa uprave nadležnog za poslove uprave.

##### **Član 2.**

U skladu sa odredbom člana 31. stav 1. Zakona o namještenicima u organima državne službe u Federaciji Bosne i Hercegovine (u daljnjem tekstu: Zakon o namještenicima), obavezu polaganja stručnog ispita imaju namještenici više i srednje školske spreme koji se nalaze na radnim mjestima na kojima se obavljaju dopunski poslovi osnovne djelatnosti iz nadležnosti organa državne službe Federacije, kantona, grada i opštine, a koji su bliže utvrđeni u propisu Vlade Federacije Bosne i Hercegovine (u daljnjem tekstu: Vlada Federacije) donesenog na osnovu odredbe člana 6. st. 3. i 5. Zakona o namještenicima.

Stručni ispit polažu i namještenici iz stručnih i drugih službi organa vlasti koji su navedeni u članu 73. Zakona o namještenicima, kao i namještenici u preduzećima (društvima) i drugim pravnim osobama kojima je federalnim i kantonalnim zakonom, odnosno odlukom gradskog i opštinskog vijeća povjereno obavljanje javnih ovlaštenja.

Stručni ispit polažu i pripravnici više i srednje školske spreme koji se nalaze na provođenju pripravničkog staža u organima državne službe i stručnim i drugim službama i pravnim osobama sa javnim ovlaštenjima iz st.1. i 2. ovog člana.

Stručni ispit mogu polagati i osobe koje se nalaze na radu u drugim pravnim osobama na području Federacije, na lični zahtjev.

Osobe iz st.1.i 2. ovog člana, mogu polagati stručni ispit kada po završenoj višoj školi provedu na radu u tim organima i službama najmanje devet mjeseci, a po završenoj srednjoj stručnoj spremi najmanje šest mjeseci.

##### **Član 3.**

U skladu sa odredbom člana 37. stav 3. Zakona o namještenicima, pripravnici stručni ispit polažu u sljedećim rokovima i to:

1. pripravnici sa višom školskom spremom stručni ispit polažu po isteku pripravničkog staža od devet mjeseci, a
2. pripravnici srednje školske spreme stručni ispit polažu po isteku pripravničkog staža od šest mjeseci.

##### **Član 4.**

U skladu sa odredbom člana 32. stav 1. Zakona o namještenicima, namještenici koji se nalaze na radu u organu državne službe, a nemaju položen stručni ispit, dužni su taj ispit položiti u roku od šest mjeseci od dana stupanja na snagu ovog pravilnika.

## II - PROGRAM STRUČNOG ISPITA

### Član 5.

Stručni ispit obuhvaća sljedeće predmete:

1. Osnove ustavnog sistema,
2. Organizacija organa uprave u Federaciji,
3. Upravni postupak,
4. Radni odnosi u organima državne službe,
5. Kancelarijsko i arhivsko poslovanje u organima državne službe.

Sadržaj materije za svaki predmet iz stava 1. ovog člana, utvrđuje se u programu koji se nalazi u prilogu ovog pravilnika i čini njegov sastavni dio.

## III - SASTAV KOMISIJA ZA POLAGANJE STRUČNOG ISPITA I NAČIN POLAGANJA ISPITA

### 1. Sastav i imenovanje Federalne komisije za polaganje stručnog ispita

#### Član 6.

Komisija za polaganje stručnog ispita koju imenuje federalni ministar pravde (u daljnjem tekstu: Federalna komisija) sastoji se od predsjednika i četiri člana.

Prema potrebi, mogu se imenovati dvije ili više komisija, što zavisi od broja kandidata koji imaju obavezu polaganja ispita.

Za predsjednika i članove komisije imenuju se lica iz reda diplomiranih pravnika koji su se istakli u radu na normativno-pravnim, upravnim i drugim stručnim poslovima u federalnim organima državne službe i drugim federalnim institucijama.

Federalna komisija se imenuje za period od dvije godine.

#### Član 7.

Rješenjem o imenovanju Federalne komisije određuju se ispitivači za svaki predmet iz člana 5. ovog pravilnika, kao i zapisničar komisije.

### 2. Nadležnost Federalne komisije

#### Član 8.

Pred Federalnom komisijom stručni ispit polažu namještenici i pripravnici iz člana 2. st. 1. i 2. ovog pravilnika i to:

1) namještenici i pripravnici više školske spreme iz federalnih, kantonalnih, gradskih i opštinskih organa državne službe, kao i stručnih i drugih službi organa vlasti navedenih u članu 73. Zakona o namještenicima i iz pravnih osoba koje imaju javna ovlaštenja i drugih organa i pravnih osoba iz člana 2. stav 4. ovog pravilnika,

2) namještenici i pripravnici srednje školske spreme iz federalnih i kantonalnih organa državne službe i stručnih i drugih službi federalnih organa vlasti iz člana 73. Zakona o namještenicima, kao i pravnih osoba sa javnim ovlaštenjima utvrđena na osnovu federalnog zakona.

### **3. Postupak prijavljivanja i polaganja stručnog ispita**

#### **Član 9.**

Polaganje stručnog ispita obavlja se na pismeni zahtjev kandidata.

Kandidati iz člana 8. ovog pravilnika, zahtjev za polaganje stručnog ispita podnose Federalnom ministarstvu pravde.

Uz zahtjev se prilaže:

1. uvjerenje o završenoj školskoj spremi,
2. uvjerenje ili potvrda o pripravničkom stažu, odnosno o radnom stažu.

Federalno ministarstvo pravde donosi rješenje kojim odobrava polaganje stručnog ispita za kandidate koji ispunjavaju propisane uslove, odnosno rješenje kojim se odbija zahtjev za polaganje stručnog ispita za kandidate koji ne ispunjavaju propisane uslove.

#### **Član 10.**

U rješenju kojim je kandidatu odobreno polaganje stručnog ispita određuje se vrijeme polaganja stručnog ispita.

U rješenju kojim se odbija zahtjev za polaganje stručnog ispita navodi se razlog zbog kojeg se zahtjev odbija.

Protiv rješenja iz st. 1. i 2. ovog člana može se izjaviti žalba Odboru državne službe za žalbe u roku od 15 dana od dana prijema rješenja.

#### **Član 11.**

Stručni ispit se polaže u sjedištu Federalnog ministarstva pravde.

Izuzetno, po odobrenju federalnog ministra pravde, stručni ispit pred Federalnom komisijom može se polagati i van sjedišta organa iz stava 1. ovog člana, ako za to postoje opravdani razlozi.

#### **Član 12.**

Stručni ispit se sastoji iz pismenog i usmenog dijela.

#### **Član 13.**

Zadatak iz pismenog dijela stručnog ispita daje član Federalne komisije koga odredi komisija, a sastoji se od rješavanja praktičnog pitanja iz oblasti upravnih i stručnih poslova osnovne i dopunske djelatnosti organa državne službe.

Pismeni zadatak radi se prije pristupanja polaganju usmenog dijela stručnog ispita.

Izrada pismenog zadatka može trajati najduže dva sata.

#### **Član 14.**

Na usmenom dijelu stručnog ispita provjerava se osposobljenost kandidata za praktičnu primjenu propisa iz predmeta navedenih u članu 5. ovog Pravilnika, a u okviru materije koja je sadržana u programu svakog predmeta, s tim što se obavezno iznose i rezultati pismenog rada.

Na usmenom dijelu stručnog ispita ispitivači su dužni kandidate ispitivati samo o materiji koja je obuhvaćena programom ispita za višu odnosno srednju stručnu spremu iz člana 5. stav 2. ovog pravilnika.

Usmeni dio stručnog ispita je javan.

#### **Član 15.**

Po završenom usmenom dijelu stručnog ispita, Federalna komisija odlučuje o uspjehu kandidata, bez prisustva javnosti.

Konačan uspjeh kandidata ocjenjuje se prema ukupno pokazanom znanju na pismenom i usmenom dijelu stručnog ispita.

Komisija odlučuje o uspjehu kandidata ocjenom "položio stručni ispit" ili "nije položio stručni ispit" ili "upućen na popravni ispit iz jednog predmeta" ili "upućen na popravni ispit iz dva predmeta", s tim da se navode nazivi predmeta koji nisu položeni.

#### **Član 16.**

Kandidat koji na usmenom dijelu stručnog ispita ne pokaže zadovoljavajuće znanje iz jednog ili najviše dva predmeta ima pravo da iz tih predmeta polaže popravni ispit.

Kandidat koji na stručnom ispitu ne položi jedan ili dva predmeta, popravni ispit iz tih predmeta polaže najranije u roku od 30 dana, a najkasnije u roku od 90 dana od dana polaganja stručnog ispita.

Ako kandidat, u roku iz stava 2. ovog člana ne položi popravni ispit, smatra se da stručni ispit nije položio.

Kandidat koji na stručnom ispitu pokaže nezadovoljavajuće znanje iz tri ili više predmeta, smatra se da stručni ispit nije položio.

#### **Član 17.**

Ako kandidat ne pristupi polaganju stručnog ispita u dan koji mu je određen za polaganje stručnog ispita, ili prije početka polaganja stručnog ispita izjavi da odustaje od ispita, smatra se da ispit nije polagao.

Ako kandidat odustane od polaganja već započetog stručnog ispita, ili ne preda rad iz pismenog dijela stručnog ispita smatra se da ispit nije položio.

#### **Član 18.**

Započeto polaganje stručnog ispita može se izuzetno, odložiti na zahtjev kandidata, ako kandidat dokaže da zbog bolesti ili drugih opravdanih razloga nije sposoban da nastavi polaganje ispita.

O odlaganju polaganja započetog ispita iz stava 1. ovog člana odlučuje Federalna komisija većinom glasova o čemu se u spisu sačinjava službena zabilješka koja sadrži odluku komisije o odlaganju ispita, razlog odlaganja i datum kada kandidat treba da pristupi polaganju ispita.

#### **Član 19.**

Započeto polaganje stručnog ispita može se odložiti do 30 dana, od dana odlaganja.

Ako kandidat ne pristupi polaganju stručnog ispita na dan određen prema stavu 2. člana 18. ovog pravilnika, smatra se da ispit nije položio.

Pri polaganju nastavka odloženog stručnog ispita kandidat ne polaže one predmete koje je položio do trenutka odlaganja polaganja ispita.

## **Član 20.**

Kandidat koji je položio stručni ispit Federalno ministarstvo pravde izdaje uvjerenje o položenom stručnom ispitu.

Uvjerenje o položenom stručnom ispitu sadrži: zaglavlje koje obuhvaća naziv organa, naziv Federalne komisije, broj i datum izdavanja uvjerenja, ime i prezime kandidata, godinu i mjesto rođenja, podatak o stepenu školske spreme za koju je položio ispit, datum položenog stručnog ispita, otisak pečata i potpis federalnog ministra pravde.

U uvjerenju, u dijelu koji se odnosi na ocjenu o položenom stručnom ispitu navode se riječi "položio stručni ispit za višu školsku spremu" odnosno "položio stručni ispit za srednju školsku spremu".

## **Član 21.**

Kandidat koji nije položio stručni ispit može ponovno pristupiti polaganju stručnog ispita po isteku roka od 60 dana od dana polaganja ispita.

## **Član 22.**

Troškove polaganja stručnog ispita za namještenike i pripravnike iz člana 8. ovog pravilnika, snosi organ državne službe, odnosno stručna služba i pravna osoba u kojima se ti kandidati nalaze u radnom odnosu, s tim što troškove popravnog ispita snosi kandidat.

Troškove polaganja stručnog ispita za kandidate iz člana 8. ovog pravilnika koji se nalaze na radu u pravnoj osobi koje ima javna ovlaštenja ili drugoj pravnoj osobi ili instituciji, snosi kandidat, ukoliko te pravne osobe i druge institucije ne odluče da oni snose te troškove.

## **Član 23.**

Visinu naknade za troškove polaganja stručnog ispita pred Federalnom komisijom, rješenjem određuje federalni ministar pravde.

Predsjedniku i članovima komisije, kao i zapisničarima pripada naknada za rad u Federalnoj komisiji što se određuje rješenjem iz stava 1. ovog člana.

## **Član 24.**

O polaganju stručnog ispita vodi se zapisnik u koji se unosi naročito: sastav komisije, datum i mjesto održavanja ispita, ime i prezime kandidata, postavljena ispitna pitanja i ocjena uspjeha kandidata.

Zapisnik iz stava 1. ovog člana potpisuje predsjednik, članovi komisije i zapisničar.

Zapisnik o polaganju stručnog ispita čuva se u spisu kandidata koji je polagao stručni ispit s ostalom dokumentacijom koja se odnosi na ispit.

## **Član 25.**

Administrativno-tehničke poslove za rad Federalne komisije i evidenciju o kandidatima koji su polagali stručni ispit vodi Federalno ministarstvo pravde.

Evidencija iz stava 1. ovog člana, vodi se u vidu knjige i sadrži sljedeće podatke: ime i prezime kandidata, godinu rođenja, podatak o stepenu školske spreme za koju je položio ispit, datum polaganja stručnog ispita, ocjenu uspjeha na ispitu (položio, nije položio, pao na popravni iz jednog predmeta, pao na popravni iz dva predmeta, s tim što se navode nazivi predmeta), i broj, datum i mjesto izdavanja uvjerenja o položenom stručnom ispitu.

Evidencijska knjiga iz stava 2. ovog člana čuva se trajno.

#### IV - KANTONALNA KOMISIJA ZA POLAGANJE STRUČNOG ISPITA NAMJEŠTENIKA SREDNJE STRUČNE SPREME

##### 1. Nadležnost Kantonalne komisije

###### Član 26.

U skladu sa odredbom člana 31. stav 2. Zakona o namještenicima, pred kantonalnom komisijom za polaganje stručnog ispita (u daljnjem tekstu: Kantonalna komisija), stručni ispit polažu namještenici i pripravnici srednje stručne spreme iz opštinskih i gradskih organa državne službe koji se nalaze na radnim mjestima na kojima se obavljaju dopunski poslovi osnovne djelatnosti u skladu sa propisom koji se donosi na osnovu člana 6. st. 3. i 5. Zakona o namještenicima, kao i pripravnici srednje školske spreme koji obavljaju pripravnički staž u tim organima državne službe i namještenici i pripravnici srednje stručne spreme na radu u pravnim osobama koje imaju javna ovlaštenje po osnovu kantonalnog zakona i po osnovu odluke gradskog odnosno opštinskog vijeća.

Pred Kantonalnom komisijom stručni ispit polažu i namještenici srednje školske spreme iz stručnih i drugih službi iz opštinskih i gradskih organa vlasti iz člana 73. Zakona o namještenicima, kao i pripravnici srednje školske spreme koji obavljaju pripravnički staž u tim službama kao i javnih osoba sa javnim ovlaštenjima utvrđena na osnovu federalnog zakona.

##### 2. Sastav i imenovanje Kantonalne komisije za polaganje stručnog ispita

###### Član 27.

Kantonalna komisija se sastoji od predsjednika i četiri člana.

Kantonalnu komisiju imenuje rukovodilac kantonalnog organa uprave nadležan za poslove uprave.

Odredbe čl. 6. i 7. ovog pravilnika analogno se primjenjuju i na kantonalnu komisiju.

##### 3. Postupak polaganja stručnog ispita

###### Član 28.

Odredbe čl. 2. do 5. i čl.9. do 25. ovog pravilnika analogno se primjenjuju i na postupak prijavljivanja i način polaganja stručnog ispita pred kantonalnom komisijom.

#### V - PRELAZNE I ZAVRŠNE ODREDBE

###### Član 29.

Osobe koje su položile stručni ispit za rad u organima uprave po propisima koji su se primjenjivali na teritoriji Bosne i Hercegovine do dana stupanja na snagu ovog pravilnika smatra se da imaju položen stručni ispit predviđen ovim pravilnikom.

###### Član 30.

Osoba koja je poslije položenog stručnog ispita za srednju školsku spremu, stekla višu školsku spremu, dužna je položiti stručni ispit za tu spremu ako se nalazi na radnom mjestu na kojem je predviđen položen stručni ispit za višu spremu.

###### Član 31.

Osoba koja je položila stručni ispit u okviru drugih posebnih ispita predviđenih za određene oblasti, oslobađaju se obaveze polaganja stručnog ispita predviđenog ovim pravilnikom, pod uslovom da program tog ispita odgovara sadržaju programa ispita iz člana 5. ovog pravilnika, s tim da je obavezan polagati one predmete iz člana 5. ovog pravilnika, koji nisu položeni u okviru posebnog ispita druge struke.

#### **Član 32.**

Osoba iz člana 31. ovog pravilnika podnosi zahtjev za oslobađanje od obaveze polaganja stručnog ispita. Uz zahtjev se prilaže dokaz o položenom ispitu i program po kojem je ispit položen.

Osoba iz člana 8. ovog pravilnika, zahtjev za oslobađanje od obaveze polaganja stručnog ispita podnose Federalnom ministarstvu pravde, a osoba iz člana 26. ovog pravilnika, zahtjev podnose kantonalnom organu uprave nadležnom za upravu.

Organi iz stava 2. ovog člana donose rješenje po podnesenom zahtjevu.

Protiv rješenja iz stava 3. ovog člana može se izjaviti žalba Odboru državne službe za žalbe u roku od 15 dana od dana prijema rješenja.

#### **Član 33.**

Oslobađanje od obaveze za polaganje stručnog ispita osoba koje su taj ispit položile po propisima Republike Srpske i propisima Brčko Distrikta BiH odlučuje federalni ministar pravde.

Oslobađanje od polaganja ispita iz člana 2. ovog pravilnika vrši se na pismeni zahtjev osobe iz stava 1. ovog člana na osnovu dokaza o položenom ispitu.

#### **Član 34.**

Odredbe ovog pravilnika shodno se primjenjuju i na postupak polaganja stručnog ispita za osobe koje provedu pripravnički staž kao volonteri.

#### **Član 35.**

Danom stupanja na snagu ovog pravilnika prestaje primjena Uredbe o uslovima i načinu polaganja stručnog upravnog ispita službenika organa uprave i Službi za upravu ("Službene novine Federacije BiH", br. 24/98, 12/00, 25/01, 2/02 i 59/03) u dijelu koji se odnosi na stručni ispit namještenika.

#### **Član 36.**

Ovaj pravilnik stupa na snagu narednog dana od dana objavljivanja u "Službenim novinama Federacije BiH".